


Dr. Viana a splica riba "Diabetes y Medicina Complementario"



ORANJESTAD (AAN) -- Manera DIARIO a duna di conoce recientemente Fundacion Diabetico Arubano a organiza dos charla di Dr. Carlos Viana pa referi na Diabetes for di e punto di bista di Medicina Oriental.

E prome a tuma lugar na Centro San Martin, Santa Cruz, y e di dos na e sede di F.T.A na San Nicolas. Awe DIARIO ta reproduci e contenido di e charla cu a hiba como titulo: "Diabetes y Medicina Complementario". Den su introduccion dr. Viana a splica cu e personalmente ta prefera pa yama su profesion medicina complementario y no alternativo, ya cu e pensamiento semper mester ta cu su trabao ta pa complementa esun di medicina tradicional (regular).

Alternativa ta implica cu e persona cu Diabetes lo mester scoge y esaki sigur no ta e caso. Asina so ta posible pa brinda e paciente conhuntamente e mehor servicio medico. Medicina complementario of medicina oriental tradicional ta acerca Diabetes di un otro angulo cu Medicina Occidental Tradicional y esey no ta nada malo. Den Chines Mandarin tin dos palabra pa Dia-

betes: e tradicional number "Xiao-ke" cu ta nifica sed y desperdicio, y e number moderno: "Tang-niao-bing" cu ta nifica urina dushi. Discusion riba Diabetes ta worde haya ya for di un comienzo di Medicina Oriental, incluso den Nei Jing.

CLASIFICACION Y DIAGNOSTICO

Dr. Viana a splica cu den Medicina Oriental tradicional Diabetes ta worde clasifica den tres tipo: un tipo ariba, uno meimei y uno abao. Cada tipo ta basa riba e tres sintomanan principal: sed, hamber y urinamento excesivo. Den tur tres tipo ta existi deficiencia di "energia yin".

Pues, como docter tradicional chines bo ta diagnostica Diabetes den e siguiente forma:

1) TIPO-ARIBA: candela di pulmon unda sed ta prevalece y e persona tin un lenga seco, cora cu un capa geel y su pulso ta lige y flotante.

2) TIPO MEIMEI: candela di stoma, cu hamber y appetit grandi como e sintomanan caracteristico y e pacient tin un lenga seco y un capa geel. Su pulso ta lige.

3) TIPO ABAO: candela di riñon, unda ta observa urinamento hopi frecuente cu urina

trobel. Peso ta baha, tin biramento di cabes, dolor di lomba, y vision nubla. Kishikimento di cuero y vagina sa sosode. E lenga ta cora y e pulso ta chiquito y lige. Na Aruba e tipo mas comun ta esun di candela di stoma, cu enfasis riba e higra.

TRATAMENTO/ CUIDO DIABETICO

"Na Papiamento tin un dicho cu ta bisa cu pisca ta muri pa su boca", dr. Viana a acentua, y a splica cu consecuentemente un drogadicto ta perde tur cos y tambe su bida door di droga. Un diabetico ta mata

su mes door di cuminda robes cu ta consumi.

"Den drogadiccion e drogadicto por y ta haya ayudo di esnan cu ta rondone, pasobra droga ta ilegal y malo. Pero kendenan ta maha nan cabes cu un diabetico cu ta come cuminda robes y malo pa su salud?. Casi ningun hende!. Nos antepasadonan si tabata come saludable cu hopi berdura liber di substancianan quimico, carni, pisca y galiña fresco, hopi biaha cushina den azeta vegetal", e medico a señalá.

El a sigui bisa cu un docter den Medicina Oriental ta trata

un diabetico den prome instante pa su adiccion y abuso di cuminda robes y abundante. Pesey mes si un diabetico dicidi di consulta un docter den Medicina Oriental e mester realiza su mes bon cu e tin cu bira un "gerente" di su propio salud y cu su docter, sea complementario of tradicional regular ta solamente su consehero pa e haya e caminda di bon salud bek. "Si bo no por considera tur acercamento un perdida di tempo", el a expresa. Den otro articulo DIARIO ta sigui elabora riba e charla di dr. Carlos Viana.

Presonan Femenino no tin un lugar adecuado pa tuma aire liber



ORANJESTAD (AAN): Segun informacion haya ta bisa cu tur dia e presonan femenino encarcela den KIA mester sali pafor den cura di e instituto pa asina por tuma aire libre.

Segun por a compronde cu e hombernan tin un lugar pa haci esaki cu ta keda no mucho leu di nan cel.

Sinembargo e presonan femenino si no tin esaki, y pa tal motibo bao vigilancia di cuidadornan di preso cada uno por sali cu stoel of cu kico cu nan kier pa asina bay banda di pariba di e edificio caminda tin menos solo y asina tuma aire liber pa un rato.

Kizas dia cu a traha KIA no a pensa cu lo bay tin asina hopi hende muher cu lo cay sera pero e aña aki ya caba un

record a ser kibra mirando tur e mulanan di diferente nacionalidad cu a ser gara cu droga promer cu subi avion.

E celnan mes ta basta yen y ya caba por bisa cu por haya cel cu mas hende di loke mester ta.

Hasta tin presonan tin biaha ta ser laga liber un poco mas trempnan di loke mester ta pa asina traha lugar pa otro cu mester drenta y cu ta bin for di warda di polis.

Segun informacion haya for di algun preso mes nan ta bisa cu tin diferente hala unda tin preso.

Tin pa esnan cu a caba di drenta, tin pa esnan cu a bin sinta un poco castigo manera lunas of un pa dos aña y tin pa esnan cu tin un castigo hopi

halto pa sinta.

E celnan ta ser parti entre nan caminda e preso cu ta sintando un castigo hopi halto tin biaha por haya un cel pa su so.

Tin caso tambe unda un preso cu ta sintando un castigo halto su so den cel ta ser hinca cu un otro preso cu pafor tabata mas bien un choller y su manera di biba ta uno manera un porco haciendo asina cu e preso choller aki ta haya su mes den problema cu e otro cu ta sintando un castigo halto ya cu e bida sushi cu e tabata tin pafor e ta bin introducie na KIA lagando e cel mas bien tur sushi.

Asina por scucha hopi cosnan mas cu ta pasa den KIA cu ta cosnan cu kizas por ser regla facilmente si tin mas ordo y disciplina.